

素問上經卷之二

山陰薛本宗道凝甫纂述



表弟余士仁元德較訂

門人程紹荃芝友

全叅

男孚信景川

六氣正紀論

素問曰五氣更立各有所承何謂也

對曰相火之下水氣承之水位之下土氣承之土位
之下風氣承之風位之下金氣承之金位之下火氣

承之君火之下陰精乘之故曰亢則害承乃制制則生化外列盛衰害則敗亂生化大病此之謂也

曰六氣之正六變之紀不同其候願盡聞之

對曰請遂言之

厥陰所至爲和平少陰所至爲暄太陰所至爲埃溽
少陽所至爲炎暑陽明所至爲清勁太陽所至爲寒
霧時化之常也

厥陰所至爲風府爲蠱啟少陰所至爲大火府爲舒
榮太陰所至爲雨府爲員盈少陽所至爲熱府爲行

出陽明所至爲司殺府爲庚蒼太陽所至爲寒府爲
歸藏司化之常也

厥陰所至爲生爲風搖少陰所至爲榮爲形見太陰
所至爲化爲雲雨少陽所至爲長爲蕃鮮陽明所至
爲收爲霧露太陽所至爲藏爲霜雪氣化之常也

厥陰所至爲風生中爲肅少陰所至爲熱生中爲寒
太陰所至爲濕生中爲注雨少陽所至爲火生中爲
蒸溽陽明所至爲燥生中爲涼太陽所至爲寒生中
爲溫德性之常也

厥陰所至爲毛化少陰所至爲羽化太陰所至爲倮
化少陽所至爲羽化陽明所至爲介化太陽所至爲
鱗化施化之常也

厥陰所至爲撓動爲迎隨少陰所至爲高明炤爲曠
太陰所至爲沈陰爲白埃爲晦暝少陽所至爲光顯
爲彤雲爲曠陽明所至爲烟埃爲霜露爲勁切爲悽
鳴太陽所至爲剛固爲堅芒爲立令行之常也

厥陰所至爲飄怒大涼少陰所至爲大暄寒太陰所
至爲雷霆驟注烈風少陽所至爲飄風燔燎霜凝陽

明所至爲散落溫太陽所至爲寒雪冰雹白以氣變
之常也

曰六氣之德化政令與五行之動靜損益何如曰夫
六氣之所至也政令災變不能相加也勝復盛衰不
能相多也往來大小不能相過也用之升降不能相
無也各從其動而復之耳

曰其病生何如曰氣相勝者和不相勝者病重感于
邪則甚也

曰願悉聞之

曰厥陰所至爲裏急爲支痛爲驚駭爲筋攣綆戾拘
緩爲脇臑支滿爲胸中痛爲嘔泄爲搖動注恐爲忽
忽善怒目轉泣出耳鳴爲支廢爲掉眩巔疾爲善暴
僵仆其發機暴病之常也

少陰所至爲瘡疹身熱爲洒淅惡寒爲振慄爲狂越
躁悸爲昏惑懊懷爲息鳴爲善眠爲語笑爲衄衄血
流爲目瞑鼻塞齒痛頤腫爲肩背熱喘啞暴瘖爲痺
瘧溫瘧爲骨痠其發機速病之常也

太陰所至爲積飲否隔積滿爲中滿腹大爲食減爲

口爽爲霍亂吐利爲肌肉萎四肢不舉爲手足痲痺
爲鼓脹胛腫爲腹痛飧泄冷泄爲瘍涌潰癰爲痔其
發濡滯病之常也

少陽所至爲瘡瘍癰疽爲驚躁瞋悶爲瘕瘕爲暴痛
暴注暴死爲耳痛爲嘔涌爲血崩溺赤血便淋瀝爲
鬱冒矇昧昏憤爲痊癰爲堅下爲辛額鼻淵其發暴
速病之常也

陽明所至爲浮虛爲尻陰股膝髀膕胫足病爲皴揭
爲鼽嚏爲耳無所聞爲喘喝胸憑仰息爲欬逆上氣

爲膺背肩胛間痛爲兩臂內痛爲惡色爲鏗禁脅厥
其發暴折病之常也

太陽所至爲頭項痛爲脊強爲腰尻痛大關節屈伸
不利爲寢汗爲瘧強拘瘰爲流泄禁止爲陰厥上下
中寒爲濡泄爲寒瘍流水爲腹虛浮腫脹爲癰閉其
發卒厲病之常也

曰治之奈何曰上淫于下所勝平之外淫于內所勝
治之以所不勝命之則其要也

曰平氣何如曰謹察陰陽所在而調之以平爲期正

者正治反者反治



氣化盛衰論

素問曰氣用有多少化洽有盛衰衰盛多少同其化也願聞同化何如

對曰風溫春化同熱曠昏火夏化同燦清烟露秋化同雲雨昏埃長夏化同寒冰霜雪冬化同此天地更用之化盛衰勝復之常也

曰四時之氣至有早晏高下左右其候何如

曰行有逆順至有遲速春氣西行夏氣北行秋氣東行冬氣南行故春氣始于下秋氣始于上夏氣始于

中冬氣始于標春氣始于左秋氣始于右冬氣始于
後夏氣始于前此四時正化之常故至高之地冬氣
常在至下之地春氣常在必謹察之曰善

天不足西北左寒而右涼地不滿東南右熱而左溫
其故何也曰陰陽之氣高下之理大小之異也東南
方陽也陽者其精降于下故右熱而左溫西北方陰
也陰者其精奉于上故左寒而右涼是以地有高下
氣有溫涼高者氣寒下者氣熱故適寒涼者脹之溫
熱者瘡此勝理開閉之常大小之異耳

曰其於壽夭何如曰陰精所奉其人壽陽精所降其
人夭曰善

其病者治之奈何曰西北之氣散而寒之東南之氣
收而溫之所謂同病異治也故曰氣寒氣涼治以寒
涼行水漬之氣溫氣熱治以溫熱強其內守必同其
氣可使平也假者反之曰善

一州之氣生化不同其故何也曰高下之理地勢使
然也崇高則陰氣治之污下則陽氣治之此地理之
常生化之道也

曰其有壽夭乎曰高者其氣壽下者其氣夭地之小
大異也

註曰小者小異大者大異

故治病者必明天道地理陰陽更勝氣之生化先後
乃可以知人之形氣壽夭之期也

九宮八風論

素問曰願聞九宮八風之說何如

對曰太一徙立于中宮乃朝八風以占吉凶也冬至之日居叶蟄之宮四十六日立春之日居天留之宮四十六日春分之日居倉門之宮四十六日立夏之日居陰洛之宮四十五日夏至之日居天宮之宮四十六日立秋之日居佐委之宮四十六日秋分之日居倉果之宮四十六日立冬之日居新洛之宮四十五日太一從一至九復反于一終而復始常如是無

已也

太一移日天必應之以風雨以其日風雨則吉先之則多雨後之則多旱

凡風從其所居之鄉來者爲實風主生長養萬物從其對衝來者爲虛風主殺傷害人者也謹候虛風而避之故聖人教人虛邪賊風避之有時邪弗能害此之謂也

風從南方來名曰大弱風其傷人也內舍于心外在于脉其氣主熱風從西南方來名曰謀風其傷人也

內舍于脾外在肌肉其氣主爲弱風從西方來名曰
剛風其傷人也內舍于肺外在皮膚其氣主爲燥風
從西北方來名曰折風其傷人也內舍于小腸外在
于手太陽脉脉絕則溢脉閉則結不通善暴死風從
北方來名曰大剛風其傷人也內舍于腎外在骨
與肩背之膂筋其氣主爲寒也風從東北方來名曰
凶風其傷人也內舍于大腸外在兩脇腋骨下及
肢節風從東方來名曰嬰兒風其傷人也內舍于肝
外在筋紐其氣主爲身溫風從東南方來名曰弱